

# REMONSTRANCES

TRES-HUMBLES

QUE PRESENTE A V ROY ET A  
LA REYNE REGENTE, MERE DE  
sa Majesté, la Chambre des Comptes:

Sur les moyens par lesquels les deniers prouenus depuis plusieurs années des leuées ordinaires & extraordinaires faictes sur le Peuple par forme de Taille, des Impositions anciennes & nouvelles baillées à ferme, des autres Impositions & taxes extraordinaires d'Aiscz, celles des entrées des Villes, Marchez & autres lieux, des Creations de nouveaux Offices, augmentations de gages, droicts, & autres attributions à des Officiers des constitutions de rentes sur les Finances de sa Majesté, des Alienations de son Domaine & reuenus, des retranchements de Gages & Rentes, & d'autres moyens extraordinaires, ont esté dissipéz à la ruyne des affaires de sa Majesté & de son Estat, & à la foule & oppression de ses bons Subjects.




*Noy. C. XXII. n.º 11.*  
*— C. LXXIII. n.º 25.*

A PARIS.

M. DC. XLVIII.





**E**N TRE les fonctions que les Roys ont attribuées de temps immemorial à la Chambre des Comptes, vne des principales est, de faire rendre compte à toutes personnes de quelque qualité & condition qu'elles soient, qui sont employez au maniment & administration des deniers de sa Majesté, & du public, & d'apporter vne Iustice si exacte en l'audition, examen & iugement des comptes, qu'elle ny admette aucune recepte qui ne soit faite par l'autorité des Roys, déclarée par leurs Lettres Patentes, dont celles qui regardent la leuée des Tailles pour le courant de l'année, soient receuës par les Tresoriers generaux de France des lieux, & les autres verifiez és Compagnies ausquelles la connoissance en est attribuée par les Ordonnances du Royaume, & de ne passer ny allouër en la dépense desdits comptes aucune partie qu'elle ne soit legitiment deuë par le Roy, & ordonnée par sa Majesté pour causes necessaires, regardans l'entretienement des maisons Royales, la conseruation & manutention de son Estat, & rejeter toutes celles qui ne sont de cette nature, & qui contreuiennent aux Edicts & Ordonnances du Royaume, & avec telles rigueurs que non seulement elles portent, qu'elles seront rayées sur les comptables ou parties prenan-tes, selon qu'il y échet, mais aussi en certain eas sur les ordonnateurs : Les Roys ayans voulu par telles peines contenir chacun en son deuoir, & ce, afin qu'aucun n'entreprist de dissiper leurs finances, ny surcharger ou opprimer leurs Sujets.

Neantmoins la Chambre a conneu que des personnes employées par le feu Roy & vos Majestez au fait de leurs finances, & ceux qui au detrimement de vos affaires & du public, ont eu vne auidité insatiable de deuenir riches en peu de temps, pour essayer d'éuiter les iugements de la Chambre, & la rigueur des peines indiètes par leddites Ordonnances, se sont seruis pour faire leurs affaires des comptans par Roolles & par certifications, encores qu'ils sceussent tres-bien, que dans le comptant par Roolle, il ne s'y doit employer que ce que le Roy prend tous les mois pour ses menus plaisirs, & qu'il n'a esté introduit que pour cette nature de dépense, & pour le comptant par certification, qu'il n'a esté

mis en vſage, que pour trouuer vne forme d'aquit qui puſt ſeruir de décharge au Treforier de l'Eſpargne, & eſtre paſſé en la dépenſe de ſon compte par la Chambre pour les deniers qui ſe payent par le commandement des Roys, à cauſe des affaires ſecrettes de l'Eſtat, qui ſe traittent dans les Cours des Princes eſtrangers, dont la connoiſſance donnée à pluſieurs pourroit nuire au ſeruice des Roys, faire découurir leurs deſſeins, & haſarder la vie de ceux de leur intelligence dans leſdits pays, qui ſont les ſeules parties qui doiuent demeurer dans la connoiſſance de peu de perſonnes.

Que ſi cet ordre euſt eſté religieufement obſerué, les ſommes deſdits comptans euſſent eſté tres-moderées, & non ſi immenſes & exceſſiues, qu'à la ſeule nomination qui s'en fait, ceux qui l'entendent en deuiennent ſurpris & eſtonnez, pour ce qu'il y a tel comptant qui monte à trois fois autant que ce qui reuenoit à l'Eſpargne il y a trente ans, de l'entier reuenue du Royaume, ſans parler de ceux où il y a des parties employées pour des ſupplémens de finances du denier quatorze au denier dix-huit. La raiſon eſt, que les comptans ſont remplis de grandes remiſes accordées par des traittez à ceux qui ont eſté les Auteurs des aduis y contenus, la pluſpart deſquels conſiſtent en taxes faites ſur des Subiets de vos Majeſtez poſſeſſeurs de charges ou d'offices des Aydes alienées & autres natures, & des retranchemens de gages, au lieu de laiſſer le recouurement de telles raxes, & retranchemens ſelon la nature des deniers au Treforier des Parties Caſuelles, ou Treforiers generaux du Domaine qui ont leurs commis en chacune Prouince. Les Roys leur ayant attribué ce maniment par Lettres Patentes deuëment veriſiées, par leſquelles les frais des recouurements ſont reglez à ſommes ſi raiſonnables, qu'elles ne montent pas au ſixième de telles remiſes.

Le meſme deſordre a eſté fait au débit des offices de nouuelle creation, car au lieu de le mettre au ſoin, & ſouz la conduitte du Conſeil, & du Treforier des Parties Caſuelles, comme il ſe faiſoit auparavant, non ſeulement afin de tirer au profit du Roy toute la raxe deſdits offices, mais auſſi pour tenir l'eſtabliſſement de tels offices nouueaux: ſans cette conſidération il en a eſté pareillement fait des traittez, par le moyen deſquels la plus grande partie de la finance a eſté conſommée en des remiſes & en des intereſts.

Outre

Outre ce que dessus, lesdits comptans se trouueront remplis de dons & gratifications, tant sur les plus clairs deniers de l'Espargne que sur des deniers prohibez par les Ordonnances, comme ceùx des creations, des attributions de gages, des alienations des Domaines de la Couronne, des Aydes, de gages, & des arrerages des Rentes retranchées, des dépenses faites pour les bastiments, ponts & chaussées qui ont plus regardé l'intérêt des particuliers, que celuy de vos Majestez & du public, des recompenses de charges non venales, de remboursements d'offices, & autres telles dépenses qu'on n'ose faire voir au iour, de crainte qu'elles eussent esté reietées par la Chambre, comme estans contre la Iustice, & la teneur des Ordonnances.

Il est vray, qu'il y a des parties employées dans les comptans pour les suppléments de Rentes, des Tailles & Gabelles constituées, au lieu des Offices & droicts assigncz sur lesdites natures supprimez par Edict du mois de Février 1634. pour faire depuis le denier quatorze iusqu'au denier dix-huit, qui ne font qu'une entrée & issuë. Ce qui n'a esté ordonné que pour rendre les constitutions conformes à celle des particuliers, à raison du denier dix-huit, selon la dernière Ordonnance. Mais cela n'a deu auoir lieu que depuis le premier Ianuier de l'année 1635. iusqu'en l'année 1640, que la plus grande partie des propriétaires de sdits offices & droicts supprimez par ledit Edict, ont raporté leurs Lettres de provision, & leurs quittances de la finance des attributions à eux faites, & bien que de soy l'employ de telle partie dans les comptans par certification ne soit mauuaise, & ne puisse nuire à vos Majestez, puisque la Chambre en iugeant les comptes rendus en icelle pour le prix principal desdites constitutions, A donné Arrest, par lequel il est ordonné que les propriétaires de telles rentes ne seront remboursez dudit prix principal desdites constitutions, qu'à raison du denier quatorze des rentes à eux constituées, Neantmoins il a seruy de pretexte pour fourrer dans lesdits comptans toutes sortes de mauuaises parties.

Il a esté encore employé esdits comptans des sommes immenses, tant pour des nouuelles rentes créées sur les Aydes, Tailles, Gabelles, Clergé, impositions sur l'entrée du Vin, cinq grosses Fermes qu'autres natures, & qui ont esté baillées à si vil prix, que les iouissances des arrerages accordez par les Traittez, ont quasi payé au Roy le prix actuel conuenu avec les Partisans, aux termes

qu'il a esté réglé par lesdits Traitez : Et ainsi vos Majestez se trouuent debitrices de sommes tres-immenses, sans auoir receu aucun secours considerable en la necessité de leurs affaires, qui par telles voyes en sont demeurées plus incômodées qu'auparauant, & le public beaucoup plus oppressé, & cette sorte d'employ dans lesdits comptans est entierement contre la Iustice & le bien de l'Estat.

C'est ce qui a obligé la Chambre sur tous les comptans de l'Espargne, où les comptans qui y sont employez, se sont trouuez monter à des sommes excessiues, d'ordonner de faire en temps & lieu ses tres-humbles Remonstrances à vos Majestez sur lesdits epceds, & y a procedé avec cette retenue, Voyant la main du Roy & son Sceau apposez à tels acquits, & les signatures des personnes qui tiennent les premiers rangs dans l'Estat, dans l'esperance qu'un iour arriueroit qu'elle feroit executer lesdits Arrests, & par ses tres-humbles Remonstrances donneroit à connoistre à vos Maieitez le grand preiudice, qu'elles & l'Estat ont receu par ces acquits de comptant, & que sans la facilité d'iceux, les finances ne seroient pas épuisées, ny les affaires du Roy reduites à l'extrefme necessité, comme elles se trouuent à present.

Et afin que vos Maieitez connoissent & soient informées de la verité de ce que la Chambremet en auant, & que la preuue en soit faite : Vos Maieitez sont tres-humblement suppliées de se faire represenar les Estats du menu de toutes les parties desquelles sont composez les comptans, rapportez sur les comptes de l'Espargne, rendus depuis l'année 1630, iusqu'en l'année 1644. & de ceux qui ont esté expediez pour estre employez es comptes du dit Espargne, des années 1645, 1646, & 1647, & les faire communiquer à ladite Chambre : Ensemble les Traitez & Arrests faits de prests, depuis le premier iour de Ianuier de ladite année 1630, Elle fera voir à vos Majestez que les sommes qui y sont employées pour les partis cy, dessus enoncées, qui en doiuent estre reietées, montent à des sommes immenses : Et vos Maieitez ne peuuent pas craindre qu'il soit aucune chose reuelé de ce qui est employé ausdits comptans, & qui doit estre tenu secret, puisqu'il le serment solennel que font vos Officiers de la Chambre d'en vser de la sorte, & leur fidelité à vostre seruice les y oblige assez.

Et ainsi vos Maieitez ne se doiuent pas estonner, voyant combien telle forme d'expeditiō préiudicie à leurs affaires & à l'Estat,

Si les Estats generaux du Royaume, & toutes les assemblées des Notables ont incité que l'usage en fust aboly : La Chambre supplie tres-humblement vos Majestez de rendre cette Justice à la fidelité & sincerité qui doiuent estre gardées en l'administration des finances, & aux interets du public, ny ayant aucune Ordonnance qui establisfe les comptans, ny qui les approuue.

Ce mauuais procedé a esté suiuy d'une autre grande importance, en ce que pendant le temps d'une guerre ouverte contre les ennemis de cet Estat, pour supporter les depenses de laquelle en tant de lieux, par terre & par mer, il se consommoit si grande somme de deniers, & se leuoit journellement, comme il se fait encorés, tant d'impositions extraordinaires, que tous les Subiets de vos Majestez, de toutes conditions, se trouuent accablez souz le pesant faix de ces surcharges, plusieurs particuliers au lieu d'obeyr à la volonté du feu Roy, portée par son Edict du mois de Février 1634. publié en Parlement sa Majesté y seant, & en la Chambre des Comptes, par lequel sadite Majesté a supprimé les offices & droits des Tailles & Gabelles y declarez, & repris à soy tout ce qui se leuoit à cause desdits offices & droicts, delaisant la somme de huit millions de liures sur les deniers desdites Tailles, & trois millions de liures & plus, sur les Gabelles, pour sur lesdites parties estre constitué des rentes par le Preuost des Marchands & Escheuins de la ville de Paris aux Propriétaires desdits offices & droicts, pour leur tenir lieu de remboursement, se sont fait rembourser en deniers contans, les vns de la finance de leurs offices & droicts, les autres des rentes qui leur auoient esté constituées sur lesdits deniers, comme aussi d'autres personnes se sont fait rembourser pour d'autres reuenus qui leur auoient esté engagez, mesmes pour droicts & offices créez depuis le susdit Edict de Février 1634, soit pour ne trouuer de l'avantage en leur reuenue, à l'égard de leur finance, soit en prévoyant les retranchements qui en seroient faits par vne nécessité apparente, qu'ils iugeoient deuoir arriuer dans les affaires de l'Estat, & ces remboursements ne sont pas de si petites sommes, qu'elles ne reuiennent à plus de trente millions de liures.

Et la Chambre lors de la rediction des comptes de l'Espagne, auxquels tels remboursements sont employez, n'ayant pu distinguer bien certainement ceux qui auoient esté faits rente, suiuant le susdit Edict, d'auec ceux faits en deniers, contre l'intention du

mesme Edict, pour estre la forme des acquits rapportez sur les parties des vns & des autres entierement semblables, auroit seulement chargé lefdites parties de souffiance, attendant que la finance y mentionnée fust par elle verifiée, pour ce fait estre les parties iugées.

Mais depuis ayant eu connoissance desdits remboursements faits actuellement en deniers, & consideré le grand preiudice que lefdits remboursements auoient apporté aux affaires de l'Estat, non seulement d'auoir esté pris dans l'Espargne cette immense somme de trente millions de liures, & plus en deniers contans, ou en moyens extraordinaires à la surcharge du public, mais aussi aux grands interets qui depuis ont esté payez pour remplacer ce grand fonds; elle a iugé neccessaire d'informer vos Majestez dudit fait, & pour en auoir vne plus parfaite connoissance, elle depute de vos Officiers pour dresser vn estat par le meru desdits remboursemens faits en deniers, attendant que vos Majestez adressent leurs Lettres Patentes à la Chambre, pour proceder à la radiation des parties de remboursements esdits comptes de l'Espargne, sauf à estre constitué des rentes aux interressez, suivant ledit Edict, pour ceux qui estoient possesseurs des offices & droits supprimez par iceluy, & faire entrer les autres dans les rentes, offices, droits & reuenus qui leur auoient esté vendus & alienez, en secourant vos Majestez des deniers qu'ils ont receus, afin de supporter les dépenses de la guerre, soulager vos autres Subiets d'une partie des surcharges qu'ils supportent, & remplacer les décharges que vos Majestez ont octroyées à vos Subiets.

Lefdits particuliers en faisant ce secours, n'auront aucun sujet de se plaindre, puisqu'ils auront ioüy sans aucun retranchement des interets des deniers prouenus de leur remboursement depuis qu'ils les ont touchez, qui est vn grand aduantage qu'ils ont eu pardeffus ceux qui sont demeurez dans leurs rentes, droicts & offices, qui ont souffert tant de retranchements.

Et pource qu'aucuns desdits particuliers remboursez en deniers, ne se sont pas contentez de recevoir le remboursement du prix principal de leurs rentes au denier quatorze, que mōtoit leur finance, comme le Roy leur auoit réglé, & la Chambre, ains se sont fait payer ledit prix à raison du denier dix-huit, par vne mauuaise foy, dont ils ont vsé enuers vos Majestez, ce qui les rend coupables du crime de péculat: Vosdites Majestez les peuuent obliger

obliger à la restitution du double de ce qu'ils ont trop receu, suivant les Ordonnances, quelques Lettres de don & de charge qu'ils ayent obtenues, qui doiuent demeurer nullës, quand mesmes elles se trouueroient verifiées, & pour paruenir à cette restitution & payement de ladite peine, enuoyer vos Lettres Patentes à ladite Chambre.

Vos Maiestez doiuent estre encores informées, qu'il y a vne Loy à laquelle les Roys se submettent en prenant leur Sceptre, & que les Officiers de la Chambre, & les Tresoriers generaux de France iurent d'observer inuiolablement, lors qu'ils sont admis en leurs offices, qui est d'empescher de tout leur pouuoir l'alienation du Domaine de la Couronne, & qu'il ne soit vsuré: C'est ce qui' oblige la Chambre à remonter à vos Maiestez, que depuis quelques années plusieurs ont inuenté & employé toutes sortes de moyens pour faire perdre au Roy la possession de plusieurs portions dudit Domaine, non seulement à certain temps, mais mesme à perpetuité, soit par des ventes nouvelles, par échanges abusifs de certaines terres & seigneuries, par dons excessifs, par augmentation de finance feinte & supposée, adioustée à l'ancienne, pour laquelle le Domaine auoit esté déjà engagé, prenant le pre-texte de faire le profit de vos Majestez, en faisant des enchères tiercement ou doublement, ce qui est arriué à tel excès, que les Receptes faites dans les comptes depuis l'année 1630, pour vente & reuente de Domaine en fonds de terre & seigneurie, monte à plus de quinze millions de liures, dont il se peut iustifier, n'en estre entré actuellement aux coffres de vos Majestez que peu de chose, le surplus ayant esté fourny en mauuaises & fausses debtes, arrerages, de pensions, dons, gratifications, recompenses, pretextes, & autre chose furtiue & supposée contre les Ordonnances, ce qui se verifiera aisément, tant par les estats du menu des comptans, lors qu'ils seront representez, ainsi que vos Majestez en sont suppliées par la Chambre, que par les comptes de l'Espargne, & se trouuera de plus, que la Couronne a esté depoussedée d'une grande quantité de bois, esquels vos Maiestez auoient droit de gruerie & grainie, tiers & danger pariage & autre droit, dont la couppe de la superficie a excédé le prix du fonds & des portions de Domaines engagées à si vil prix, qu'en trois ou quatre années de iouissance du reuenu, il s'en trouue de remboursées, & seroit



necessaire que le pouuoir de la recherche de tous ces abus, fust cōpris dans les Lettres susdites, qui sont demandées par la Chambre à vos Majestez sur le sujet des precedens articles.

La Chambre est aussi obligée de représenter à vos Majestez, que la plus grande partie de ceux qui entrent dans les fermes, ont ordinairement deux principaux desseins, l'un de les auoir à vil prix, afin d'y beaucoup gagner, & l'autre de ne manquer iamais à demander des rabais, quand il suruiuent quelque accident qui leur en peut donner le pretexte : pour paruenir au premier, ils vsent de de toutes sortes de voyes pour empescher les encheres, comme de monopoles qu'ils font secrettement avec ceux qu'ils croient capables d'entrer dans les fermes, & de propositions de prests, & aduances, lors qu'ils sont en jouissance des fermes avec grand profit, pour se faire continuer en leurs baux, se préualans de la necessité qui est dans les affaires : Et pour effectuer leur second dessein, il conuient considerer que les Commissaires, que le Conseil, ny ceux que la Chambre commet pour informer des pertes supposées, n'ont que deux voyes pour essayer de connoistre la verité du fait, l'une en informant des cas alleguez, ce qui est aisé ; mais pourtant qui n'est pas concluant à vne perte receüe, Et l'autre de se faire représenter les Registres des commis des fermiers, qui ordinairement sont doubles, l'un secret, & l'autre public, & par ce dernier la perte se trouue euidente & certaine, & ainsi vos Majestez sont tousiours circonuenuës, & est tres-necessaire que vos Majestez pourvoyent à ces inconueniens, tant en reestabliant tous les Officiers créés par Edicts deuëment verifiez és Cours Souueraines, auxquelles la connoissance en appartient, pour auoir soing de maintenir les droicts desdites fermes, & tenir fidel Registre de ce qui doit prouenir d'iceux, & les obliger à exercer leurs charges avec soyn & fidelité, comme aussi de ne laisser passet aucun bail au Conseil qu'apres les publications deuëment faites desdites fermes, & de toutes les conditions d'icelles, sans permettre ny receuoir aucune aduance, ne payer aucun dédommagement, & avec clause expresse, que pour éuiter aux fraudes que toutes personnes feront receuës à en augmenter le prix d'une enchere raisonnable, dans six mois apres la deliuité de la ferme, laquelle enchere sera neantmoins réglé selon sa qualité & valeur de chacune ferme, & faire exacte defences d'vsr d'aucun monopole, à peine de punitiō

exéplaire, de confiscation de biens de ceux qui seront coupables, & de recompenser le denonciateur du tiers de la confiscation.

Outre ce preiudice, il s'en commet encores vn autre par ceux qui entrent dans lesdites fermes, en ce qu'encores que la condition de les tenir de vos Maiestez, & de ce qu'elles seruent pour la manutention du Royaume, soit chose honneste & licite de tout temps; Neantmoins ils font mettre les baux souz noms supposés, ou de personnes peu conneuës, & de basse condition, afin de tenir le nombre des interessez dans le secret, d'où arriue qu'à suite d'années, la Chambre se trouue empeschée contre qu'elles personnes elle doit decerner les contraintes pour faire rendre compte du prix desdites fermes, & pour y eüiter, il seroit necessaire d'ordonner qu'à l'aduenir il ne s'adiugera aucun bail desdites fermes au Conseil, ny ailleurs, qu'à personnes conneuës, ressenties, deuëment cautionnées & certifiées, sans que les aduances qui leur sont demandées, leur seruent de cautionnement, d'autant qu'ils peuvent les emprunter de leurs amis, Et apres qu'ils sont entrez en la iouissance de leurs fermes, les rendre du prix d'icelles auant le terme de remboursement écheu, & ainsi vos Maiestez n'ont plus de seüreté, que la bonne foy des Fermiers, & leur gain, & cela est contre les Ordonnances, qui veulent que tous comptables, dont les Fermiers sont du nombre, baillent caution bien certifiée.

Et pource qu'il est arriué plusieurs fois que la Chambre pour n'auoir connoissance des baux des fermes, qui s'adiügent au Conseil, aucuns des Fermiers se sont ingerez en la recepte des deniers des droitz à eux affermez, sans auoir présenté leurs baux à la Chambre, mesmes que les années d'iceux se sont écoulées, sans que le Procureur general ait pü faire aucunes poursuittes alencontre des Fermiers pour les faire cõpter, sinon apres plusieurs années, dont aucuns se sont trouuez insolubles, & ont emporté & appliqué à leur profit particulier, & de leurs familles les deniers que V. M. & que le mesme desordre est aduenü au fait des commissions decernées à grand nombre de particuliers, pour faire la recepte des deniers de diuerfes nature, lesquels se sont entremis à l'exécution de leurs commissions, sans les auoir présentées à la Chambre, ny qu'elle ait pü auoir connoissance de leur maniment, ainsi apres plusieurs années qu'il a esté finy, & comme la plupart desdites commissions se mettēt sous les noms de personnes peu conneuës:

Il est impossible audit Procureur General de leur faire rédre compte de leurs gestions, ce qui est entièrement contraire aux Ordonnances. La Chambre supplie très-humblement vos Majestez d'y pourvoir, Et à cette fin ordonner qu'en tous les baux à ferme & commissions adressées à des particuliers pour le maniment des deniers de vos Majestez : Il y ait clause expresse qui oblige les Commissionnaires & les Fermiers de présenter leurs Baux & Lettres de commissions à la Chambre, avant que s'entremettre au fait d'iceux, à peine de nullité ; & de trois mil liures d'amende applicable aux pauvres de l'Hostel-Dieu de Paris, & que dans iceux Baux & Commissions, la demeure de l'Adjudicataire & du Commissionnaire y soit déclarée; Et ordonner aux Secréaires du Conseil; de mettre au Greffe de la Chambre vne copie de chacun desdits baux & commissions le mesme iour, qu'il les deliureront aux parties, dont sera fait mention sur les originaux & copies, & qu'ils feront le semblable des actes de caution, que lesdits Fermiers & Commissionnaires rapporteront audit Conseil dans les trois premiers iours qu'ils les auront receus, & si pour certaines considérations aucuns des baux ou commissions sont signez ou expediez en commandement, que le mesme ordre sera observé par ceux qui en feront l'expedition, & ce à peine aux vns & aux autres de radiation de leurs gages, appointemens & pensions.

La Chambre est aussi obligée de représenter à vos Majestez le grand préiudice qu'elles reçoivent, & le public de la facilité qui a esté donnée à toutes personnes indifféremment d'entrer dans les offices comptables en aneantissant les susdites Ordonnances, par lesquelles tous comptables sont obligez de bailler caution de leur maniment sur les lieux, & que cette caution soit deuëment certifiée de la solubilité : Et cette Ordonnance est fondée sur deux raisons principales, l'une afin qu'il n'entre aucun dans tels offices qu'il ne soit connu, & l'autre qu'il y ait des surveillans des actions desdits comptables, & cette facilité est prouuée de la faculté donnée aux Officiers comptables de tenir leurs offices en heredité, & de les auoir dispersez sous prétexte de ladite faculté de bailler caution, d'autant qu'il se trouuera telle personne entrée dans des charges comptables, qui n'a eu autre bien, que ce qui luy a esté besoin d'auoir pour payer aux Notaires les frais de l'expedition du contract de l'acquisition de son office, & aussi que plusieurs acquteurs & pos-

seffeurs des offices, soit pour euitier les continuelles contraintes qui s'exerçoient alencontre d'eux, à cause des taxes faictes sur leurs offices, soit pour tirer indirectement de grands avantages de leur maniment; en s'emparant des deniers de leurs charges, & les appliquant à leur profit particulier; les ont mis souz les noms de leurs domestiques, ou de gens peu connus, & c'est de-là d'où arriuent tant de faillites & banqueroutes de comptables, & pour y remedier, il seroit necessaire qu'il plust à vos Maïestez adresser leurs Lettres de Declaration à la Chambre, pour faire obseruer lesdites Ordonnances, nonobstant ladite faculté d'heredité attribuée aux Officiers comptables, & de dispense de bailler caution, ne deuant ladite heredité seruir en la définissant dans la verite, que pour tenir lieu à l'Officier de dispense de quarente iours.

Et d'autant qu'il est souuent aduenü que par la mauuaise foy des Commissionnaires Fermiers & autres, qui s'ingerent au maniment des deniers Royaux; vos Maïestez & les créanciers de fciets particuliers se trouuent frustrez de leur deü : Il est iuste & raisonnable que vos Maïestez y pouruoient, & ordonnent que tous biens de quelque nature que ce soit par eux acquis, ou donnez à leurs enfans en faueur de mariage, ou autrement, mesme les offices qui se trouueront leur appartenir, mis souz noms empruntez ou donnez à leursdits enfans depuis qu'ils sont entrez en leurs baux à ferme, au maniment desdits deniers Royaux demeurent affectez & hypothéquez à vos Maïestez & à leurs créanciers, pour raison de quoy, il plaira à vos Maïestez adresser vos Lettres de Declaration aux Parlemens, Chambre des Comptes & Cours des Aydes, portans derogation à toutes choses à ce contraires, les Ordonnances faites sur le fait des offices comptables demeurant en leur force & vertu.

La licence donnée à toutes sortes de personnes de proposer des moyens extraordinaires au preiudice du seruice de vos Maïestez, du bien de l'Estat, & de vos Subiets, a esté depuis quelques années si grande, que sans considerer, ny les proposans, la nature de leurs aduis, leur suite, ny leur conséquence, pourueu qu'il y eust quelque aduance de deniers, toutes ont esté indifferemment receues: En sorte que les Loix & Ordonnances du Royaume ont esté enfraintes: C'est pourquoy la Chambre supplie tres-humblement vos Maïestez, afin de ne plus tomber en ces accidens, de reietter toutes propositions qui sont preiudiciables à vos Maïestez,

à vos Officiers, & à vos autres Subiets, & faire defences à toutes personnes de mettre en auant telles propositions, comme tendantes à subuersion des Loix du Royaume, & entièrement preiudiciables à l'Estat.

Vos Majestez doiuent estre aussi informées, que depuis plusieurs années la fonction de ladite Chambre enuers les Officiers comptables, les Fermiers, les Commissionnaires a esté comme suspendue par les frequents Arrests du Conseil, portans surseance de ceux de la Chambre, donnez contre les Officiers comptables, Fermiers & Commissionnaires, pour les obliger à rendre leurs comptes, suivant lesdites Ordonnances, mettent en auant des pretextes, que lesdites Ordonnances condamnent, & cela leur donne moyen de se seruir des deniers de leur maniment, au desauantage du seruice de V. M. & du secours que doit estre apporté aux vrgens affaires de l'Estat, & de demeurer en vne confusion telle qu'elle empesche ladite Chambre à rendre le seruice qu'elle doit à vos Majestez : C'est pourquoy vos Majestez sont tres-humblement suppliées de reuoker tous les Arrests de surseance donnez au Conseil, & donner ordre qu'à l'aduenir il ne s'en donne plus de semblables, & renvoyer ceux qui demanderont telles surseances en ladite Chambre pour leur faire droit sur leurs Requestes, ainsi qu'il appartiendra, ou nonobstant ce, il s'expedioit semblables Arrests au Conseil, ordonner que ladite Chambre ne laissera de passer outre à l'execution des Arrests qu'elle aura donnez, pour faire rendre lesdits comptes, comme chose estant entièrement de sa charge, de son deuoir, & conformes aux Ordonnances.

Il est encores du deuoir de la Chambre de représenter à vos Majestez le preiudice qu'elles ont reccuës en diuerses manieres, & leurs Subiets contribuables aux Tailles, aux Traittez faits par Generalitez des deniers des Tailles avec des particuliers.

La premiere, pour auoir transmis à des particuliers traittans l'autorité de vos Majestez pour leuer sur le peuple des deniers des Tailles par toutes voyes de rigueur, sans aucune excepter, & non permises par les Ordonnances, ny iamais vûtes dans le Royaume, sinon par les ennemis de l'Estat : lors que pendant la guerre ils ont exigé des contributions sur vos Subiets, d'autant que par telles rigueurs extraordinaires, & exercées mesme à contre temps, la pluspart des contribuables aux Tailles ont esté ruynez & ren-

des invtils, & fans moyen de continuer à payer la Taille ez années subseqentes, & se verifiera qu'en plusieurs lieux les frais des leuées & du recourement des deniers ont surpassé de beaucoup plus ce qui se deuoit leuer au profit de vos Majestez: c'est ce qui a tant causé de non-valeurs, & qui rend mesmes aujourd'huy tant de parroisses invtiles, & hors de moyen d'asseurer les sommes portées par les mandemens des Tailles qui leur sont adressees.

La seconde, pour auoir esté consommé vne moitié de deniers des Tailles, tant en remises qu'en gros interests, & sur-interests, ce qui a obligé le feu Roy & vos Maieitez à consentir à des grandes re-impositions des non-valeurs, afin d'essayer de recouurer du fonds pour supporter les depenses de la guerre, & satisfaire aux depenses des Estappes, & qui a beaucoup aidé à l'acablement des contribuables ausdites Tailles.

La troisiéme, de ce que lesdits Traittans pour empescher qu'on ne découurist les rigueurs & mauuais traitemens faits sur les contribuables aux Tailles, ont depossédé tous les Receueurs generaux des Finances, & les Receueurs particuliers des Tailles qui n'ont voulu prendre part avec eux dans leurs Traitez, & en leur lieu, lesdits Traittans ont commis de leurs domestiques, ou des personnes inconnues, & non domiciliz, & cela a esté cause que depuis plusieurs années il y a eu peu desdits Receueurs generaux & particuliers qui ayant rendu leurs comptes, s'excusans auoir esté depossédez de leurs charges par les Intendans enuoyez ez Generalitez à la fuscitation des Traittans. Et lors que le Procureur general de ladite Chambre fait ses diligences pour faire compter lesdits Commis, il ne s'en est trouué aucun, & par ce moyen il ne se peut exercer aucune contrainte alencontre d'eux, d'où arriue qu'on ne peut connoistre ce qui s'est leué sur lesdits contribuables, ny l'employ des deniers par eux payez.

Vos Maieitez voyent par ces inconueniens, comme elles ont vn tres-grand interest de remettre les impositions & leuées de deniers des Tailles en leur premiere & ancienne forme, & le plustost sera le meilleur pour leurs peuples, & pour le bien de leurs affaires.

La Chambre pourroit encores représenter à vos Majestez plusieurs choses de consequence, qui touchent leur seruice; mais elle s'en retient, iusques à ce qu'il plaira à Dieu donner vne paix ferme & stable en toute la Chrestienté, & se contente pour cette

fois des presentes remonstrances, en suppliant tres-humblement V. M. de les vouloir considerer, & porter leurs pensées & leurs volontez à les faire executer, & puis qu'elles ne regardent que l'advantage de leurs services, les moyens de supporter les depences de la guerre par voye iuste & equitable, pour paruenir à cette paix tant desirée, & au soulagement de tous leurs Sujets de toutes conditions, qui depuis tant d'années souffrent des necessitez si extresmes, qu'elles ne se peuuent exprimer qu'avec estonnement, & les larmes aux yeux: ce qui doit exciter vos Maiestez a y donner vn prompt remede, & ce sera vn oeuvre de parfaicte iustice & charité qu'elles exerceront enuers leur peuple, dont la posterité leur donnera des louanges immortelles.

*Fait & arresté les Semestres assemblez le quatorzieme iour d'Octobre mil six cens quarente-huit.*

Signé, BOYRLON.

